

UCAPAN YANG AMAT BERBAHAGIA  
DATO SERI DATIN PADUKA  
DR. SITI HASMAH BTE HAJI MOHD. ALI  
YANG DI-PERTUA BAKTI  
DI UPACARA PENUTUPAN RASMI PERLAWANAN  
BADMINTON PIALA PUSINGAN TOH PUAN SUHAILA  
DI DEWAN BADMINTON LEMBAGA LETRIK NEGARA  
KUALA LUMPUR, PADA HARI AHAD  
8HB. OKTOBER, 1989  
PUKUL 4.00 PETANG

---

Yang Amat Berbahagia Toh Puan Suhaila;

Yang Berhormat Menteri-Menteri,  
Timbalan-Timbalan Menteri dan  
Setiausaha-Setiausaha Parlimen;

Yang Berbahagia Yang Di-Pertua/  
Pengerusi-Pengerusi Badan-Badan Wanita  
Negeri;

Para Dermawan Yang Budiman;

Pemain-Pemain Dan Penyokong-Penyokong;

Puan-puan dan tuan-tuan yang dihormati sekalian,

Assalamu alaikum warahmatullahi wabarakatuh dan selamat sejahtera.

Bersyukur kita ke hadrat Ilahi kerana dengan limpah kurniaNya, maka berakhirlah Perlawanan Badminton Piala Pusingan Toh Puan Suhaila hari ini dengan selamat dan jayanya.

2. Saya mengucapkan terima kasih dan mengalu-alukan kehadiran para tetamu, khasnya Yang Amat Berbahagia Toh Puan Suhaila, penaja Piala Pusingan ini yang sudi hadir serta menyampaikan hadiah kepada para pemenang perlawanan sebentar lagi. Saya juga mengucapkan terima kasih kepada Yang Berhormat-Yang Berhormat kerana turut hadir menyaksikan kehebatan isteri-isteri mereka bermain pada hari ini.

Puan-puan dan tuan-tuan,

3. BAKTI mula menganjurkan perlawanan ini pada tahun 1985 dengan tujuan utamanya untuk menjalinkan kemesraan dan silatullahim antara isteri pemimpin-pemimpin negara dan negeri melalui sukan. Antara beberapa jenis sukan yang digemari oleh rakyat Malaysia, BAKTI telah memilih badminton kerana, yang akan bermain ialah isteri-isteri yang telah berusia lebih daripada 35 tahun, di mana permainan-permainan sukan yang lain umpamanya bolasepak dan sepak takraw

dirasakan tidaklah sesuai bagi golongan ini selain daripada badminton.

4. Pemilihan ini juga didorong kerana BAKTI mempunyai seorang jaguh badminton iaitu Yang Amat Berbahagia Toh Puan Norashikin, dan beliau telah dilantik sebagai Ketua Pengurus Pasukan Badminton BAKTI. Beliaulah yang mengelolakan perlawanan ini dari tahun 1985 hingga kini. Saya mengambil kesempatan ini bagi pihak semua Pasukan Badminton Wanita yang hadir, mengucapkan penghargaan dan berbanyak terima kasih kepada beliau kerana pengorbanan masa, tenaga dan wang ringgit bagi menentukan setiap perlawanan badminton ini tamat dengan licin dan sempurna.

5. Dorongan untuk mengadakan perlawanan badminton ini juga diterima daripada penaja BAKTI, Yang Amat Berbahagia Toh Puan Suhaila yang telah menyumbangkan piala pusingan untuk dijadikan piala rebutan setiap tahun selama lima tahun. Kerana sumbangan ikhlas itulah, piala pusingan tersebut dinamakan Piala Pusingan Toh Puan Suhaila. Saya bagi pihak semua yang hadir di perlawanan ini, mengucapkan setinggi-tinggi terima kasih kepada Toh Puan kerana sumbangan beliau itu.

Puan-puan dan tuan-tuan,

6. Pada peringkat permulaan, isteri Menteri-Menteri Besar dan Ketua-Ketua Menteri diminta menubuhkan pasukan badminton

masing-masing yang terdiri daripada isteri pemimpin-pemimpin negeri dengan tujuan yang sama iaitu berkumpul dan bermesra melalui pertandingan badminton. Sambutan daripada isteri-isteri di peringkat negeri amatlah menggalakkan sungguhpun pada tahun 1985 tidak semua negeri dapat menyertai perlawanan yang pertama diadakan. Sebagai penganjur, BAKTI telah menjadi tuan rumah di Kuala Lumpur dan selepas itu pasukan yang menjadi juara menjadi tuan rumah pula. Pasukan Pulau Pinang telah menjadi juara pada tahun itu.

7. Pada tahun 1986, perlawanan badminton diadakan di Pulau Pinang di mana Melaka telah memenangi Piala Pusingan. Pada tahun 1987, Melaka telah menjadi johan sekali lagi, dan Selangor sebagai naib johan. Pada tahun 1988, BALKIS dari Selangor telah mempèlawa untuk mengadakan perlawanan ini di Selangor bagi menggantikan tempat Melaka. Dalam perlawanan tersebut BAKTI telah menjadi johan. Walau bagaimanapun, BAKTI telah bersetuju menjadi tuan rumah pada tahun terakhir perlawanan ini tanpa mengambilkira menang atau kalah.

8. Saya ingin merakamkan penghargaan saya kepada Kerajaan Negeri Pulau Pinang dan Pasukan Bunga Tanjung, Kerajaan Negeri Melaka dan Pasukan BISTARI, dan Kerajaan Negeri Selangor dan Pasukan BALKIS atas kerjasama dan sambutan yang gilang-gemilang pada masa-masa perlawanan itu. BAKTI berterima kasih kepada Ketua-Ketua Pasukan negeri tersebut

iaitu isteri Menteri Besar dan Ketua Menteri dan Setiausaha Kerajaan Negeri Pulau Pinang yang telah menentukan bahawa perlawanan-perlawanan serta perjumpaan-perjumpaan mesra selamat sempurna.

Puan-puan dan tuan-tuan,

9. Soal yang timbul sekarang ialah sama ada matlamat BAKTI menganjurkan perlawanan badminton ini tercapai atau tidak, dan apakah rancangan setelah Piala Pusingan Toh Puan Suhaila ini menetap terus di . . . . . Sebagai seorang pemain badminton semenjak tahun 1985, saya berani mengatakan bahawa kemesraan dan persaudaraan antara isteri-isteri semakin erat setiap tahun. Penyertaan pasukan isteri-isteri dari negeri-negeri bertambah hinggakan pada tahun lalu, 13 pasukan isteri-isteri telah menyertai pertandingan ini di Petaling Jaya.

10. Daripada segi permainan pula, sungguhpun belum ada tujuan pasukan-pasukan isteri menawarkan diri untuk bermain di Sukan SEA atau Uber Cup, tetapi kemajuan dan kejayaan setiap pasukan adalah nyata. Pada tahun 1985, bulu tangkis tidak tentu hala arahnya apabila dipukul. Manakala pada tahun 1986 sedikit kemajuan telah dicapai, sekurang-kurangnya bulu tangkis yang dipukul telah berjaya melepasi net. Para pemain telah mula kenal siapa lawan dan siapa kawan. Pada tahun 1987 iaitu semasa pertandingan ini diadakan di Melaka, para pemain telah mencuba smash ala

Razif-Jalani sehingga ada yang tercampak cermin matanya. Pada tahun lepas pula, bulu tangkis yang tidak tentu hala pada mulanya, sudah menuju tepat ke sudut-sudut gelanggang, ke jaring, ke kepala, ke badan dan ke marta mana jua ianya dihalakan. Pada tahun ini, para hadirin telahpun menyaksikan dengan sendiri betapa hebatnya isteri-isteri bermain. Kebanyakan daripada pemain-pemain ini sudah pun bercucu, tetapi kerana minat, mereka tidak mengira usia atau berat badan. Aliran kemajuan ini adalah sihat dan menggalakkan. Oleh itu, tidak ada sebab mengapa perlawanan badminton ini berakhir selepas ini.

11. Dalam perlawanan semacam inilah kita dapat berjumpa beramai-ramai, bermesra, memperkukuhkan tali silatulahim antara peserta-peserta dan penyokong-penyokong. Melalui perlawanan inilah kita dapat menjelajah ke negeri-negeri serta melihat bandar-bandar di negara kita. Dengan adalah perlawanan ini juga kita dapat berlatih dan menguatkan semangat berpasukan dan perpaduan dengan erti kata yang sebenarnya.

12. Ketua-Ketua Pasukan bersama-sama dengan penasihat-penasihat mereka telah bersetuju supaya perlawanan badminton ini dihadkan kepada badan-badan wanita yang dianggotai oleh isteri pemimpin-pemimpin negara dan negeri sahaja kecuali jika bilangan isteri-isteri yang boleh bermain badminton adalah kurang. Pemain luar dihadkan kepada empat orang sahaja dengan syarat mereka tidak pernah

mewakili negeri masing-masing atau negara dalam mana-mana perlawanan badminton pun. Saya berterima kasih kepada semua Pasukan-Pasukan Badminton Negeri yang patuh kepada peraturan-peraturan tersebut.

13. Syarat yang mengatakan johan perlawanan menjadi tuan rumah telah dimansuhkan atas dua sebab utama: pertama, Kerajaan-Kerajaan Negeri tidak ada peruntukkan untuk membiayai 14 pasukan wanita ke negeri masing-masing secara rasmi. Kedua, syarat yang dikenakan kepada bakal johan telah menjadi penghalang kepada pemain-pemain berlawan dengan bersungguh-sungguh. Majlis Ketua-Ketua Pasukan bersetuju tempat perlawanan badminton selepas ini akan diadakan di tiap-tiap negeri secara pusingan dan secara tawaran daripada negeri-negeri. BAKTI juga akan membantu pasukan yang menjadi tuan rumah dengan sumbangan wang sebanyak \$10,000.00 seperti biasa, insya-Allah.

Tuan-tuan dan puan-puan,

14. Perlawanan tahun ini disertai oleh . . . pasukan yang menunjukkan semangat sukan yang cemerlang. Saya mengucapkan tahniah kepada juara tahun ini, iaitu Pasukan . . . . . dari negeri . . . . . yang dipimpin oleh Yang Berbahagia . . . . . Piala Toh Puan Suhaila tidak lagi berpusing dan akan menetap di negeri . . . . . Syabas kepada . . . . . kerana kehandalan mereka bermain hingga berjaya.

15. Sudah menjadi adat sesuatu perlawanan, ada yang menang, ada yang kalah dan ada juga yang cuba-cuba bermain. Belum ada tanda-tanda antara kita yang berusia lebih 35 tahun jaguh-jaguh seakan-akan Razif, Jalani, Rashid ataupun IcuK, tetapi yang bergaya seperti mereka memanglah banyak. Kalau tidak menang pun tidak mengapa asalkan sedikit semacam jaguh-jaguh antarabangsa pun jadilah! Mudah-mudahan pada satu ketika nanti, kita akan berjaya juga akhirnya.

Puan-puan dan tuan-tuan,

16. Kejayaan perlawanan ini adalah hasil daripada kerjasama beberapa pihak. Saya ingin mengucapkan penghargaan dan terima kasih kepada:

a. Para dermawan yang menyumbangkan wang dan alat-alat permainan kepada BAKTI, iaitu:

Sports Toto	-	\$30,000.00
Tun Omar Ong	-	\$10,000.00
M.N.I.	-	\$ 5,000.00

b. Pihak Dewan Badminton kerana memberi kebenaran untuk menggunakan Dewan ini.

c. Yang Amat Berbahagia Toh Puan Norashikin Ismail, Ketua Pengurus Perlawanan Badminton ini semenjak tahun 1985 hingga kini. Panduan dan nasihat mengenai

peraturan-peraturan datangnya daripada seorang yang mantap dan mahir dalam pengurusan perlawanan. Kepada beliau bagi pihak BAKTI khasnya dan semua pasukan yang hadir amnya, saya mengucapkan tahniah dan berbanyak terima kasih.

- d. Kepada Jawatankuasa Pengelola dan Jawatankuasa Kecil BAKTI yang menguruskan segala-galanya selama tiga hari ini.
- e. Kepada Ketua-Ketua Pasukan Negeri dan pemain-pemain mereka yang bersusah-payah datang bermain. Saya harap kita akan terus berlatih dan bermain di tempat masing-masing supaya mutu permainan kita itu sentiasa meningkat. Ahli-ahli baru dijemput bermain bersama supaya sihat, segar dan bermesra.
- f. Kepada para pengadil dan penjaga garisan serta pegawai-pegawai yang membantu pengawasan perlawanan, terimalah penghargaan kami dan ucapan terima kasih kerana meluangkan masa untuk bersama dengan kita.
- g. Akhirnya tidak kurang penting di dalam penghargaan ini, BAKTI amat berbangga dengan kehadiran Yang Amat Berbahagia Toh Puan Suhaila yang amat di kasihi pada petang ini. BAKTI cuba menarik minat Toh Puan untuk bermain badminton bersama tetapi belum lagi berjaya. Insya-Allah kita cuba lagi.

Puan-puan dan tuan-tuan,

17. Sekali lagi saya mengucapkan terima kasih kepada tetamu-tetamu jemputan yang hadir dan memberi sokongan kepada isteri-isteri yang bermain. BAKTI akan mengaturkan perlawanan seperti ini pada tahun depan, insya-Allah, dengan lebih meriah dan dengan penyertaan lebih ramai pasukan lagi. Diharap kita mendapat pelawaan daripada negeri-negeri untuk menjadi tuan rumah dan diharap juga, insya-Allah pasukan-pasukan wanita negeri akan memberi sambutan.

18. Selamat pulang ke negeri masing-masing dan selamat bermain lagi,.

Wabillahi taufik walhidayah wassalamu alaikum warahmatullahi wabar\*akatuh.

\*\*\*\*\*